

Di sier Andrea Griti, provedador zeneral, dal ponte di la Torre, si ave letere, di eri. Come erano nostri reduti con le zente li, et i nimici haveano abuto Soave, dove era Matio da Zara, et Lonigo et Cologna, dove, a Lonigo e Cologna, haveano usato gran crudeltà e brusato *etc.* *Item*, come col governador e altri condutieri haveano concluso, la matina levarssi e intrar im Padoa, e perhò si mandì danari e le altre provisione debite. *Item*, altre particolarità, *ut patet.* *Item*, i nimici hanno mandato uno araldo a Montagnana, a dir, si rendi. *Item*, lui provedador, scrisse a sier Zuam Diedo, è con fanti e cavali su el Polesene, vengi li e versso Padoa, e abandoni il Polesene, e cussi li altri podestadi di Lendenara et la Badia.

Da poi disnar fo pregadi, et leto dite letere, e di sier Christofal Moro, provedador di Padoa. Come eri, ogni horra, pareva zente dil campo nostro a le porte di Padoa, a Santa † per intrar, e lui provedador non à voluto vi entri alcuno *etc.* *Item*, scrive altre provision bisogna, e tutti core im Padoa.

Di Vicenza non è alcun aviso di queste cosse, che a tutti par di novo.

De Ingaltera, di sier Andrea Badoer, orator nostro, date a Londra, l'ultime de X avosto. Di la bona mente dil re in ajutar il papa, *maxime* inteso la perdita di Bologna. *Item*, scrive il mode fo scoperto quel Hironimo Bonvixi, orator dil papa, qual conferiva tutto con l'orator francese, è li; e fato a saper al re, lo fece spiar e fo trovato, la note, drio certi muri parlarssi insieme, *adeo* fece prender dito Bonvixi, e volendolo tormentar, confessò esser la verità, et aver auto in commissione di farlo, dil cardinal Pavia. *Adeo* il re à scritto al papa di questo. *Item* scrive, e questo è certo, di una liga conclusa tra il papa, re di Spagna e re di Ingaltera, a conservation di stati e contra Franza, lassando locho a intrar a l'imperador et a la Signoria, come la sarà in acordo con l'imperador *etc.*, *ut in litteris.*

Fu posto, per li savij, elezer uno cassier per mexi 6, in luogo di sier Lorenzo di Prioli, à compito. Tolti tre, rimase sier Alvixe Malipiero, fo consier, poi sier Lorenzo di Prioli e sier Piero Capelo, fo savio grande.

Fu posto, per li savij, excepto sier Antonio Trun, procurator, e sier Francesco Foscarei, savij dil consejo, dar al mexe a sier Zuam Paulo Gradenigo, ducati 100 per spexe, e titolo di zeneral, come fu fato a sier Christofal Moro. Et sier Anzolo Trivixan, el consier, per la inimicitia l'ha con dito sier Zuam

Paulo, quando fu presa l'armata im Po, hessendo capetanio zeneral, contradise, dicendo, è contra le leze, e fe' lezer do parte prese in gran consejo, poi rimaso uno non si pol cresser agumento di salario. Li rispose sier Piero Balbi, savio dil consejo, e laudò il Gradenigo *etc.* Or andò le parte: 52 di no, il resto di si, et fu presa.

Fu posto, per li savij, che l'ultima X.^{ma} al sal a 171 restituir, sia perlongà con il don a pagar, per tutà questa seplimana, *ut in parte.* Fu presa.

Fu posto, per li savij, e fo per il gran mormorar fe' la terra, che prima, per colegio fo ordinato, niun potesse portar formenti in questa terra di le soe intrade, senza aver li bolletini de non esser debitor di la Signoria, *adeo* quelli erano debitori di le angarie e altro, non havia potuto far condur, e fo mal fato, ora fo terminà, che tutti conducesseno senza boletim *etc.*

Fu posto, per li savij, una letera in corte a l'orator nostro, avisarli questi successi, et il campo nostro se ne vien im Padoa, et altre particolarità secrete, *ut in ea*, e zercha il Bajon; et fo disputation. Parlò sier Francesco Foscarei, el cavalier, fo consier; et sier Piero Balbi, savio dil consejo, li rispose, e fo presa la letera.

Et licentiatò il pregadi restò conseio di X con la zonta per danari.

In questa sera si parti el cardinal senonense, sguizaro, va a Roma. Andò a Gioza, dove montà su la galia sotil Pasqualiga, candiota, qual fu di Histria fata passar a Chioza a questo effecto, et va a Rimano. *Etiã* potrà levar Zuam Paulo Bajon, electo governador zeneral di l'exercito nostro, qual è a Perosa.

A dì 6, la matina. Viene in colegio Agustim Gixi, e disse, era contento dil marchà, e dete li zentilhomeni vol per piezi, numero . . . , *videlicet* procuratori, consieri e altri ricchi dil senato. E si dolse dil legato, *tamen* si tien, se intendino insieme. *Unum est* si averà doman ducati XX milia e se li darà le zoie, *videlicet* quelli diamanti, perle *etc.*, fo dil ducha di Milan, ch'è im pegno a la Signoria nostra.

Di Padoa, dil provedador Griti, di eri. Come, a hore 19, intrò con tutto il campo dentro, per non mostrar di esser fugado, e tutto il conta' è in fuga. Tutti vien im Padoa; è tanti cari, che non si pol andar per le strade; atendeno ad alozar le zente. *Item*, sono fanti 1500 con lui, ma im Padoa prima erano assai venuti. *Item*, dil zonzer di sier Zuam